

四庫全書

集部

欽定四庫全書

集部

皇清文穎卷十八

詳校官檢討臣朱依昊

主事銜臣徐以坤覆勘

覆校官中書臣田尹衡

校對官監丞臣侍朝

謄錄監生臣張炳

欽定四庫全書

皇清文頴卷首十七

御製文

賦

耕藉賦

并序

皇上御宇之五年青帝司方之二月春風普扇陽德方

亨

天子乃耕于千畝之田禮也

臣聞聖王務本耕藉以勸

農功明主孝親推以供祀事我

皇上孝以事

親勤以率民二載甲辰既耕加一茲又

躬行耕耨之禮急染盛重民食致誠匪懈其典則隆洪  
惟我

皇上道洽天人化霑草木誕敷文德廣運聖謨渥澤周  
于羣生至治昭乎天壤乃猶頻興重農之典時勤保  
介之咨追厥唐虞播種之蹤為彼率土民人之勸萬

衆觀儀上農終畝迨厥秋成登于天庾薦之

皇天供于

祖考

臣知

皇天

祖考鑒

皇上之精誠歆

皇上之大孝必錫嘏降祉永保無疆明德惟馨聿懷多

福

臣

不勝踴躍懼忤之至謹拜手稽首而獻賦曰

繫惟重華之命稷兮播穀實繼乎禹功必烝民之粒食  
兮始風動而時雍親耕肇于姬籍兮意往聖之皆同我  
大君之首出兮屢三推以勸農豈玉食之是享兮惟簠  
簋之虔供秉耒耜以率先兮符澤物之元功于是春陽  
初布青帝司方嘉萬物之昭蘇值千卉之勾萌農祥既  
見土脈方昌協風應律陽氣滋彰

皇帝乃順月令撫嘉辰念民力飭甸人當前期而致敬  
用有事于青春于焉載師清畿封人淨路常伯獻儀掌

舍設栢爾乃青壇蔚其聳立華華森其崔巍雲移翠幕  
柳拂青幃啟千畦之平壤欣四塗之腴肥逮夫元辰既  
屆曉色方鮮

天子則御藻冕佩蒼琬被龍袞鳴和鸞載青旗揚朱旗  
接游車之駉駉施梁輶之芟芟爾乃稷官將近樂具班  
陳

天子乃降御輦饗農神祈嘉穀焚燎薪禮成而退有事  
藉田衣被襜褕趾履陌阡王侯衛後虎賁導前太僕秉

轡牽牛奉鞭乃歷廣場撫御耦執縻手底不辭瘁乎三  
推載耒御間試躬親乎千畝王公卿貳或五或九白叟  
黃童歌呼奔走維誠敬之聿昭知樂愷之孔厚于是儵  
耜方輟紺轅遂旋雨廉纖以灑潤風縹緲而淨天侍從  
偕耒睹

天顏之有喜馨香上達卜慶兆于豐年夫元鳳下親耕  
之詔永平垂開耜之篇魏主望公田而發趾晉帝帥羣  
后以祀先尚傳為古今之盛事並書之史冊而爛然况



乎我

皇至仁大知既事治而府修亦成天而平地修稼穡以  
勤民謹神倉而歲事所無逸以知艱重明藻而將祭三  
春暖兮播百穀四野寧兮進雙穗也哉乃為之歌曰田  
之興兮稷之功澤萬物兮助鴻濛我

皇展事兮千耦其同和協天人兮一哉

皇衷既耕既耨兮我稼其豐爰播爰植兮麻麥幪幪又  
歌曰思樂甸畿千頃其耦

鸞輅載臨

躬拊其畝登于秋廩斯箱斯倉薦之  
宗廟供之明堂神之格思綏祉無疆

一人有慶永奠萬邦

四時勤政賦

惟聖人之建極兮法天運以自強歷四時以勤政兮亦  
日就而月將堯兢兢而舜業業兮萃芳軌于我

皇禹惜陰而湯浴德兮繫日進以無疆道既立而化淳  
兮美光天之徧育如雲日之為瞻兮統要荒而臣服大  
哉

帝德輝光被乎八埏允矣

皇風恩波沃乎四瀆爾其一日萬幾宵衣旰食誦抑戒

陳無逸昧爽不顯夜以繼日既勞謙而匪懈亦健行而  
不息勤問夜于未央雖寸晷而猶惜若乃春居東以首  
歲夏居南而執衡秋居西而司歲冬居北而主成春動  
也物以之起夏任也物以之生秋收也物以之結冬凍  
也物以之貞聖人推本萬物之理而欽象四時之行政  
刑準之以有度治教由是而皆平燠寒應候而時若雨  
暘順序而歲亨此吾

皇四時之勤政而用致九有之和寧者也又若政要書

屏箴規刻珮日移崇政之餐汗浹延英之背彼古事之  
云遠覩今茲之盛代厪夕惕與朝乾用持盈而保泰信  
日昃而弗遑豈臣鄰之可貸

聖主圖治以勵精庶政分司而用乂于是喜而歌曰九  
鼎奠兮泰階平

皇風普兮庶物亨萬邦惟懷兮歌永清

皇心猶戒兮無荒寧朝夕兢惕兮象天行錫極敷言兮  
惟至誠拜手稽首兮于玉庭

萬壽無疆兮道成

東郊迎春賦

震宮初動兮青帝司辰勾芒節屆兮木德惟仁條風入  
律兮鳥歷紀新展東郊之盛禮兮觀畿甸之迎春既備  
禮而備儀兮亦有則而有倫蓋欽承上帝而敬授于下  
民者也爾乃迎春東郊既著于月令青珪禮神亦載于  
周禮斗柄東指而萬物生地氣上騰而蟄蟲啟出土牛  
以示農駕玉輅而虔祀于是服蒼玉載青旗宗伯前導  
王公後隨有嚴有翼不疾不遲樂奏而凝寒頓減舞進

而陽和自滋于是歡迎白叟笑舞黃童夾道霏微而灑  
雨平林縹緲而搖風喜鴻鈞之氣淋知大有之年豐自  
南自北自西自東北皇都迎春之令典而萬國莫敢不  
來同者也于是勅庶司決獄訟非終必赦惟祥是用象  
暖律之發生乃省刑而寬衆又若降制詔勞三農助萌  
陽勸田功法恩光之普扇布仁政以胥融于斯時也戶  
裊綵旛簷飛輕燕柳綠綺宮梅榮芳殿和風拂兮簾惹  
遊絲暖日長兮鶯啼睨睨金屏麗而帖寫宜春寶扇開



而漏傳玉箭溥禁裏之春光煦閭閻而皆徧乃為之歌  
曰迎東郊兮肅以將舞雲翹兮歌青陽乘時布令兮德  
施長億萬斯年兮紀春王

--	--	--	--	--	--	--	--

喜雨賦

客有駕輶軒乘雲輶展軫乎南畝縱轡于東郊遨遊容  
與徘徊逍遙爾乃白雲起乎空谷甘霖降于崇朝震雷  
燿燿飛電熒熒乃往田舍而息焉有二三老人逡巡而  
前曰斯雨之降時則時矣膏澤之濡普而施矣抑誰之  
功乎請吾子明言以告之客奮袂而起曰猗歟休哉盛  
世之民也飲其德而不知其力坐吾明語子方今龍飛  
九五聖人在位德配乾坤功參天地精誠通于神明政

教化乎萬類故上天眷命俾雨暘時若而萬方以治乃  
至含哺鼓腹耕田鑿井者實不知帝力之賜也老人曰  
聖人之德某既知之矣請吾子賦雨之澤及蒼生者可  
乎客曰若夫金烏收景層陰蔽空雷殷殷以振響電灼  
灼以搖紅鼓河伯之驚濤涌海若之幽宮瀉天池之巨  
浸走萬里之長虹遠迷三島近失千峰迴生意于衆卉  
消渴望于三農此則雨之方作而其勢最雄也乃其雲  
開雨止霽景澄鮮山宛宛其染翠木蓊蓊其逞妍鳥嚶

嚶其鳴樹草芊芊其含烟柳暗歸鴉簷喧乾鵲槐影濃  
兮庭宇清花陰轉兮簾櫳薄纖歌動兮高樓紅綉飄兮  
綺閣綳帙開兮芸編博山焚兮繡幕莫不欣膏澤之滂  
澍喜雷聲之頻落此又雨之既足而萬方共樂者也至  
若烏犍耕白水之涯黔黎藝綠野之畝白叟歡呼黃童  
奔走土脈既滋兮禾麥如雲灌溉不勞兮田疇以阜爾  
倉爾京爾荷爾負此又二三子所終日服事而知利我  
之孔厚也于是老人倚杖而歌曰雨玉不可食兮曷若

嘉苗滿目屯黃雲雨金不可衣兮曷若五風十雨利耕  
耘惟天降康兮稽首蒼旻惟皇感天兮永眷日勤千秋  
萬歲兮樂吾之君

燈花賦

夫何三冬之夜永兮聽玉漏之丁丁耿宵寒之不寐兮  
羌讀史而論經對銀燈之熠燿兮何用夫隨月與囊螢  
松風蕭蕭於戶外兮爰閉牕而掩櫺獨兀坐于幽齋兮  
賴詩書之是娛引短檠而置前兮瑤篇卷而復舒注膏  
油以續餘燼兮光燦爛而晃如何生意之忽發兮開花  
朶于斯須曾不根而自華兮焰炯炯而扶疎萼蓓蕾而  
金輝兮葩晶瑩而錦敷丹艷灼灼兮火蕊煌煌離精發

瑞兮內隱外光飛蛾嬉其來往兮恍如蛺蝶探擷乎春  
芳乍蔽乍虧兮若續若離匪青匪綠兮參錯歲蕤可遠  
觀而不可近玩兮花無葉而有枝歷四時而皆榮兮又  
如火蓮冬秀乎雪池爾乃釵綴玉蟲兮枝堆寶粟光炫  
縑綃兮影搖帷幕度長夜之迢迢兮喜銀缸之續續靜  
對而意蓋欲生閒吟而筆花交錯方作伴于形影兮信  
有佐于誦讀若夫庭燎通晨九華達旦雞蹠蓮花之巧  
龍銜火樹之艷麗乎未央之宮燦乎承明之殿斯金闕



之壯觀豈書齋之清玩又若帝城三五上元佳時鼇峰  
千仞金蓮萬枝縹綵與繁光共絢銀花與寶炬爭奇固  
遊觀之雜選非靜賞之所宜乃為之歌曰幻非幻兮色  
可親實非實兮報先春朗瑤室兮席上珍照芸編兮日

日新



鳳凰來儀賦

以聖化感孚泰平瑞應為韻

惟

聖皇之建極兮膺九五之寶命沛仁恩于四海兮教化  
洋溢乎萬姓天不愛道而地不愛寶兮百福畢致而延  
慶乃威鳳之翔集兮符

一人之神聖嘉彼休徵應我

王化向畿輔而高騫覽德輝而載下惟羽族之三百實  
超羣而莫亞

聖德惟純祥禽潛感稟鶉火之靈曜資和氣之融暖信  
鹿後而麟前亦雞喙而燕頤必梧桐之是棲非琳瑯而  
不啖爾其九苞六象兮五色紛敷戴仁纓義兮臨信惟  
孚負禮向智兮順德不渝晨鳴賀世兮飛鳴郎都行鳴  
歸嬉兮止鳴提扶是皆斯禽之神異掩餘瑞于瑤圖者  
也若夫黃帝阿閣之巢雖雖喈喈帝嚳六英之舞萋萋  
颺颺虞廷來儀而神人格岐山和鳴而聖道泰孰若當  
邳治之休明集王畿而遠邁曠千古而一覩昭德感于

聖代是以六府治九功成金甌固泰階平上瑞駢臻歡  
聲徧乎閭里嘉祥疊奏喜氣達于寰瀛乃為之歌曰鳳  
凰來兮

皇之瑞集天畿兮拱

帝位

帝德光被兮靈祥萃

聖心彌寅兮勤自治敬

天貺兮罔或肆又歌曰吉士藹藹鳴鳥協應曷由臻茲

我

后德盛萬有千載遐荒安定

重修

闕里文廟告成賦

丕鑠惟清

聖祖神宗既承顯之式穀允精一而執中欽明文思克讓允恭洋溢滴沔萬國來同

皇上御極是法是則煥天下于文明登九有于衽席重道而

先聖是欽崇儒而

素王惟式

天鑒孔昭佑我

一人謂

闕里之經營既久斯

尼山之廟貌宜新藉締造于昭代貽制作于

聖君

天子乃命司空勅匠作爾經爾營乃量乃度走羣靈而  
驅八神鳩工徒而諮衆略屬無閭不注之巉巖伐秦嶠



嵩高之叅錯良材川委大木神輸授模定式審方辨隅  
陶埴鍛厲之俱備丹青巧冶之咸臚凡工倕與匠石莫  
不奏伎而待須爾乃日嘉時良爰動鑿聲錘徒奮力獲  
人充盈既陿陿而薨薨亦登登而馮馮大冶耀兮金烟  
霏屑噴兮瓊英斧斤丁丁兮觀揀度之胥法繩墨綿綿  
兮看約掾之咸平矯枉兮既直削腐兮用貞曉畚索索  
畫杵訇訇俄而確輝玉礪赤煥雲楣豐融曼衍揭業陸  
離祕殿聳兮盤鳳傑閣矗兮卧螭何巨麗之方建乃卿

商之呈奇曜藻流光兮鬱蒨而承日麗懸華曳紫兮紆  
縵以布天垂斯固天文與人文並燦聖居與聖澤偕丕  
者也若乃級層階于東西拱脩廡于左右大成殿大成  
門實

御筆之親書聖時門弘道門更

睿思之口授圭瓚俎豆之式新犧牲幣帛之加舊添配  
祀之羣賢增執事之奔走色瓦頌自尚方

御碑摹以重鏤丹楹列乎瓌材采栢揭乎纖繡則其為

狀也邈穹隆以宏壯巨砰磷而窅冥殖殖兮其庭噲噲  
兮其正宏卓爍以輝赫兮若燭龍蜿蜒而鬚鬣紛攢羅  
以威魄兮若巨鼇鼎鬲而崢嶸斯翼斯棘兮屬閣道之  
駸駸如松如竹兮衛鉤陳之縱橫倣巖廊而布象準魏  
闕以為程礪礪既堅知為高之基下綺䟽交映悟立誠  
之牖明至夫既落既成乃祭乃饗

命王子而徂征昭

一人之敬仰牲牷肥腍黍稷豐穰衣冠肅恭進退雍容

遶豆既旅樽壘斯崇以間兮笙鏞於論兮鼓鐘神既妥  
兮和冲降多福兮隆隆蓋尊

聖之典無以尚統前後而莫有或同者也于是為之歌  
曰堂皇靈宇

天子是新既輪既奐乃珣乃璘杏壇葱鬱檜幹續紛宣  
聖是安佑我後人歷億萬禩丕煥斯文

萬壽日慶雲見苗疆賦

惟

皇清肇三韓而定業肇盛京以立基既應天而昌運亦  
撫民而順時

世祖白旄黃鉞仁義興師于是乎撫有四海宅燕京而  
嚮離於皇

聖祖作則生知正義育仁以馭世制禮作樂以定規六  
十一年之湛恩渥澤逮我

皇而克享其雍熙丕鐸

皇德

聖祖是式精神通于神明聲色允其恭默勤政亶乎八  
年至仁敷乎萬國擊壤者歌何有之帝力含哺者順無  
為之帝則

昊天曰明鑒我

皇情何祥勿應有瑞畢呈乃撫謙而自牧更持虛而若  
盈或歸

親而不居或讓美而弗稱斯固

一人之大德巍巍蕩蕩而難名者也歲在上章月惟淵  
獻

帝澤均施

皇風普扇坤輿載闢紅苗允致其共球版籍初登六里  
亦安其服旬乃宣布化誨之初辰實誕降吾

皇之聖旦鴨保寨之大吏初臨地良坡之苗民同忭池  
河營之猺獞咸臻萬榮江之老幼共見異地而

王命頒陳同時而卿雲燦爛歸誠之愚民稽首何異華  
封之祝三宣意之將吏傾心允似嵩高之呼萬氤氲捧  
日擘碎錦之千重縹緲麗天幻榮光于萬變為樓為閣  
拱黃道以旁敷非霧非烟被清風而不散五文絢彩于  
璇霄十色流虹於碧漢此重譯之來不聞奏于越裳七  
旬之格不聞歌其紉縵者也況于嘉時正午恰當

景命之辰歷未及申允愜綿長之願彼夫升堂于黃帝  
之時起河于伊耆之代入房于殷湯之宮浮洛于周成



之載穆天子之王母為謠漢武帝之泰山紀再或一色  
而無文或旋聚而忽分豈如歷三時之久當

聖壽之辰現新附之地昭歸化之民又何足稱函關紫  
氣帝鄉白雲哉乃為之歌曰於赫

聖治兮格于

蒼天嘉瑞聿昭兮于彼苗田格愚孚頑兮

王化普宣祝我

聖壽兮億萬斯年

--	--	--	--	--	--	--	--

指佞草賦

銅龍曉啟玉漏初傳氤氲曙色縹緲祥烟朝萬國之球  
壁列百辟之班聯爰有靈苗曰指佞草非時不見實天  
地之無私應候而生允皇王之有道則見夫峙丹陛而  
葱菁秀彤墀而縹緲金莖露灑潤貞幹之稜稜玉殿香  
凝靄斜枝而裊裊無心而應獬冠之觸何殊有佞則知  
金鏡之洞已早至若元愷登而僉壬化明良慶而庶績  
熙雖間生于堯代實藏用于明時對右平兮左城承日

照兮風披千官劍珮三殿威儀則屈軼亦呈其瑞而已  
矣又安得夫邪佞而指之

六藝賦

居高齋以遠紹娛情志于典墳藉義府之息游望宮牆  
其聿新伊六藝之為懿雖宿儒而必親予下學其何知  
敢玩愒而不遵矧夫禮緣情以制物樂平情而返初射  
必先乎正直御必範乎馳驅書貴六文之不忒數窮大  
衍而有餘于身為終始之伴于道為行邁之輿請為言  
其美備俾達者其聽諸原夫禮儀三百威儀三千既安  
上而治民亦緯地而經天其制之也必傳道之聖其行

之也必守道之賢郊廟有饗祀之典朝宁有聘會之虔  
尊尊則衣冠拜舞親親則酬酢蕃駢尊卑賴以等殺進  
退恃以周旋是蓋禮之大者而其細尤莫能以盡焉粵  
自軒轅雲門定樂溯原必本于中和相濟必分其清濁  
以歌則管聲噦噦以舞則鷺羽翯翯五音六律之交宣  
八風九歌之相續審音兮既換羽而移宮吹律兮復度  
商而揣角入耳兮躁心以釋傾聽兮欲心以平雖宜觀  
于韶舞必先放乎鄭聲以宣民志以和民情惟樂舞之

至正斯風俗其可成若夫敦弓既堅四侯既均可緣此  
而觀德亦因之而序賓在澤在宮必有一定之制少算  
多算難紊不易之倫騶虞之節今天子所用狸首之風  
兮諸侯是陳慎其所舉取制于中聖王合射以明教男  
子蓬矢而桑弓在昔宣尼曰執御矣平心正體兮在茲  
自下奉上兮以此四黃既駕兮總轡分鑣兩驂不倚兮  
過都越鄙追電兮逐風發矜兮殪兕鄙組舞于東野羨  
辭乘之王良愛遽瑗之過關馳造父于康莊孰謂御為

賤役非君子之所方哉至若畫始義皇字肇蒼頡史載  
觀于蹄迹易稱代乎繩結百官以治兮宣猷萬民以察  
兮仰哲迨書契之大明快芭符之盡洩于焉籀斯造乎  
前驅義獻繼乎後乘文皇飛白張顛草聖顏柳法嚴蘇  
黃筆勁雖歷代有作者要悉歸乎心正若乃司天之職  
推步萬端黃鍾定其分至玉律辨其暑寒既參天而兩  
地亦稽坤而考乾下至內府外府之歲會郊人廛人之  
定田無一則何以成十有百則至于累千參伍而其法



備錯綜而其數全豈若商鞅近功始按人而立稅弘羊  
心計算舟車與緡錢蓋所以裕國計敬昊天惟損上而  
益下乃自古而云然懿茲六藝用藉尋求若行遠兮駕  
車若溯川兮泛舟嗟不學兮面牆期佩服兮優游庶不  
忒兮我心用電勉兮前修



日方升賦

伊蒼旻之懸象兮煥二曜之重明麗中天以臨照兮終  
萬古而健行分宵旦之行藏兮仰瑞應于升恒維光華  
之烜爛兮百昌欣以向榮偉魄淵之繼照兮請仰觀旭  
日之方升明萬彙其伊始兮符天心之生生方其玉繩  
罷繫斗杓收指望舒隱曜以西馳啟明藏輝而遠徙覽  
東方其生白眇海水而煥紫滄溟罷浴駕羲御以邁征  
火馭載臨邁天衢其自此璇圖不忒兮正羲仲之寅賓

玉律無差兮合容成之步晷銀蚪渴兮燭龍翔陽鳥飛  
兮曜靈揚出渤澥兮經若木歷暘谷兮拂扶桑瀛海燐  
燐洗寶輪而皎潔咸池炳炳拱神鏡以汪洋玉衡隱約  
兮低度瑤華烜赫兮含章照彼鮫宮添輕綃之晃朗射  
茲龍窟增寶藏之輝煌則見金門初啟玉漏停傳天雞  
喚兮報曙寶鼎列兮生烟陽侯執轡兮炫彤墀之璀璨  
后羿揚麾兮催青瑣之班聯雲旗縹緲兮映百川之會  
海霞車陸離兮靄萬國之朝天此出震一人之有慶向

離敷治以無偏者也至若六街香霧九陌紅塵曙色方  
升晉謁之驄駟晨光乍爛計偕之車轡轡瞻祥光之  
錯落覩瑞靄之氤氲此王路馳驅之士鸞翔鵲起而欣  
欣者也又若幽人曠逸竿甫逾三學士清嚴輒未倍四  
梳翻雲髻兮曉景透乎香閨經開貝葉兮晨鐘鳴乎古  
寺丹橫野渡兮驚月落而烏啼獵合平原兮喜黃犂而  
蒼臂草木向曙以敷榮飛走和鳴而得意此又臨照無  
私恩光遍及于萬類者也斯時也後天一度而輝燭于

大荒出地咫尺而宣耀于無疆夜光無所施其用火齊  
無可耀其光杖何為兮誇夸父戈何為兮稱魯陽荦何  
用兮其豐繩何施兮其長考盈虧兮何與驗中昃兮無  
妨若太極兮始判而將分如元會兮方流而未央又何  
必紀合璧于伊耆之代舉抱戴于晉帝之堂侈談王字  
之瑞徒稱五色之光哉客有興寄泰山之嶠神游日觀  
之峰睹初陽之煒煜攬顥氣之冲融開懷抱暢心胸鄙  
熊曜瑯琊之迹追青蓮登眺之蹤將游心乎太始觀造

物之元功





水輪賦

削竹為管，採木為輪。假廣川之利潤，代膏雨之洪恩。因時制宜，奚必資乎匠伯；澤民利物，乃有待于梓人。爾其東作云興，西成在望。大田多稼，或懷旱魃之憂；密雲不雨，每廛旻天之貺。雖抱甕之勤，奚為即挈瓶之利？亦讓于是轉岸上之飛輪，汲江中之巨浪。方來旋去，訖機軸之周環；已納而吐，欣洪波之奔放。劃如雷鼓之聲，翩若飛鳬之狀。揚清激濁，兮大澤旁通；救患分災，兮連畦滋。

暢鄙桔槔之小惠殊轆轤以致功匪疾匪徐兮運旋而  
不竭突如來如今灌注而莫窮盈科而進兮施有次第  
轉轂而輸兮用無始終流洋洋兮比潤甘霖苗蕤蕤兮  
同舒律暖垂稻穗兮隴畝勻黃築場圃兮篝車載滿是  
知輪者木之體既冥順而有功水者坎之盈亦剛中而  
有信相資以濟引重之象何殊因物而施救膜之功以  
迅敬陳澤物之奇勲用備風人之雅訓

文戰賦

甚矣人之好爭也軒尤鼓怒于凶器羿浞鬪技于霜鋒  
賁育逞力于舉重般婁恃巧于雕蟲良增驚智于劉項  
儀秦馳辯于橫從是蓋所居者高則惡人之我並所操  
者異則嫉人之我同未有解構釋紛齊天地于一指和  
光同塵歸大化之元宗者也吾意文人學士知命樂天  
謙卑自牧慎重為先其游心于淡也若太羹之味其麗  
澤相滋也若共濟之船宜其煦煦為儒魚魚為賢不惡

我之或後不憎人之或前而孰知所謂文戰者更有甚  
于前言當其屬詞鋒排筆陣萬夫之雄莫擬六籍之奧  
並進徹札之鏃必期乎中堅露穎之囊何妨于游刃鸚  
視而張弛咸宜虎變而雷霆用震于是絀帙繽紛盡作  
鼓輦之響絳帷掩映俄興旌旆之思呼十二之龍賓發  
攄奇策揮五千之文字奮迅徧師臨局早分其勝負當  
場疊用其正奇弟子降心而斂手先生談笑而解圍是  
蓋厲兵于學海藏甲于文山請纓同弱冠之子投筆似

定遠之班硯石如砥兮紀功莫盡霜毫飛白兮露布爰  
頒齊物子見而笑之曰是蓋以文為戰者夫文以載道  
而又何戰乎請與子解干戈之擾而歸洪荒之都



景陵瑞芝賦

蓋聞王者孝慈則芝茂又曰君有至德則芝生仁恩覃  
敷于率土草木爰叶夫嘉禎考夫瑞應之圖稽乎符命  
之經未有治功允協乎郅理而祥應不驗于山靈者也  
欽惟

聖皇御世敬

天法

祖煦嫗之澤比陽春汪濊之恩如膏雨亮工則克諧三

事歌敘則允治六府凡溥大化于雍熙悉循

聖祖之遺矩

上帝是鑒靈瑞斯頻河清海晏之紀麟遊鳳集之文與  
夫嘉禾甘露之迭見蓋不可以指數陳是皆

一人格

天之元功而厚澤永逮夫生民者也乃若瑤光發辰象  
之精金色吐陰陽之秀衍

鼎湖兮億載休徵輦



福地兮萬年鴻祐繽紛芝采表

聖祖盛德之常新煥爛芝房驗吾

皇孝思之孔厚金枝瓊葉浥瑞露于

寶城十色九光燦祥霞于仙園鏤珊瑚而作幹葩蓋高  
擎肖龍鳳以呈形卿雲低覆氤氲並日月以爭華蔚靄  
與松楸而並茂豈與夫生于石室產自珠宮王母之臺  
虛紀宓妃之館成空秀甘泉之庭而傳誇晉帝產延英  
之座而稱美唐宗也哉

聖聖同揆德惟其至既丕顯而丕承信格

天而格

地嘉祉効乎百靈景運凝乎二氣謹拜手而颺言賦太  
平之至瑞

春蒐賦

文武之道一弛一張政以則乎四季令如煥乎三光其  
禮則備其文則詳雖寓意乎簡卒亦致戒乎禽荒故當  
春氣之始和行蒐禮而如常蓋所以開三面儀萬方豈  
云魚必殲其鯢魴獸必索其羶羊者哉于斯時也東作  
未興猶是三農之隙孳尾未接豈妨百獸之生春蠶也  
爰宣威以象動蒐求也乃法古以考成進退疾徐固將  
明其紀律勾擊搏刺亦莫過乎縱橫藉以整軍豈惟逐

獸六軍之節制可觀三畋之儀文斯究安不忘危兮經  
國之典斯存用而有節兮胞與之仁在宥乃足賓筵用  
供乾豆此以見國家之大體可以比先王之蒐狩不然  
者苟非黷武即屬從禽于是乎有風人之刺禹甸之箴  
子雲所以賦羽獵相如所以諷上林又豈君人者之以  
天地之心為心者哉

皇清文頴卷首十七

欽定四庫全書

皇清文頴卷首十八

御製文

賦

書同文賦

偉哉書契之盛也麗光天而有耀敷海宇而無垠掌之  
保氏而肇夫小學觀乎人文而成彼大勲代結繩而為  
治因載道以稱神洋溢之風普扇光華之治聿新書紀

導道導路記稱同軌同倫固草野咸欽其法式抑巖廊  
用布其絲綸繫夫庖犧造書倉頡創字蚪蚪成形魚鳥  
誌瑞原所始作不一其類迨後八體漸分六書遂製或  
篆隸而殊科或爻戈之異制或偃露湧泉而稱工或離  
星垂珠以布勢或揭象魏之條或質歲成之計或遊元  
圃之麟或折蟾宮之桂莫不依乎典則導我王章錯綜  
以盡其術採摭以備其詳藻耀乎典冊之府輝煌乎翰  
墨之場指事象形之中則協聲轉注之允臧潤太平而

有色宣文治於重光於是靖萬慮之紛拏布一人之大  
化金殿春永而閣帖臨餘玉筆龍飛而黃麻草罷欲加  
點而無有詎一畫之可假昭萬里之同風自一人而逮  
下明廷敷奏曾無馬字之訛在野遵從何有魚書之詐  
則知聖人有作書文大同自南自北自西自東光如日  
月之燭遐屆舟車所通布章程於畫一闡治理於鴻濛  
豈操觚而濡墨者徒工技雕蟲也哉





聖德合天地賦

聖人膺寶籙握靈圖躋含生於富壽致萬類之昭蘇澤  
允覃乎九有道克奉乎三無欽明文思帝堯無以踰也  
溫恭允塞虞舜曷以加乎紀巍巍與蕩蕩信一揆而同  
符天無不覆地無不載蒼蒼者昭丕冒之宏混混者順  
發生之大窺博厚而難名測包容而無外是亘古此天  
地也而誰與為對待哉王者中和位育並立為三規模  
既同乎情載對越尤致其精嚴故升中於天而鬼神格

告成於地而恩澤覃茂以對時而行无妄卑以自牧而  
體福謙於是歌一德之允若與二儀而脗合布政則溫  
如春融育物則量同海納明如日也麗九華以昭宣散  
如風也紀八節於閭闔然而高明既被朝夕彌虔昭事  
則幾康是飭行健則元會永綿小心翼翼是曰法天若  
夫廣大咸亨品物必遂既柔順而利貞亦履仁而行義  
安土能敦是曰則地於是乎乾坤合德君師並修海宇  
仰崇高之象羣靈樂靜謐之休徧尊親於血氣成參贊

之謨謀豈非與清寧而永奠合上下而同流者哉

欽定四庫全書

卷十八

麥秋賦

緊鶉火之司令疑商金之屆期影度朱明始散芳於榴  
圓律侵白帝獨抽穗於麥畦愛芄芃之連纈亦離離之  
下垂南畝正勤於此日西成偏紀乎茲時披梅風而含  
穎潤穀雨而雙岐是蓋四時之代序而萬物各遂其繁  
滋者也乃其隄上鶯啼隴間雉雊芳草未歇而猶菲綠  
樹成陰而始就何銍艾之奄觀兮當隆曦之永晝覩黃  
雲之滿野兮驚白藏之應候溽寒露而朝濡兮潛陰呂

而夕秀雜收斂於長養兮參結實於紛茂炎炎當令碩  
碩成行紫莖兮韞爽青穗兮含涼大有占而豐登肇象  
兮中和順而隴畝飛香對銀縉而偶穗兮散珠顆而分  
芒豈非化工之獨運而為

盛世之嘉祥也哉

學問至芻蕘賦

原夫泰岱之高不讓土壤而尊五嶽河海之廣不擇細  
流而納百川載萬物而不盈者曰地覆羣有而不居者  
唯天是以有大而能謙必豫見善而能遷始賢固至理  
之如此豈入道而不然蓋自先民有言詢于芻蕘既下  
問之不恥乃大德之孔昭野無遺才英俊彈冠夫廊廟  
政皆不應庶人罷議於市朝固已五風順十雨調集濟  
濟之多士覩師師於百僚然而謙謙君子延訪不遺夫

草莽穆穆元后諏諮乃逮夫薪樵是以禹下昌言之拜  
湯勤有莘之招高宗恭默而得左右於巖野周公勤思  
而傳吐握於崇朝凡其守謙以受益用是居上而不驕  
爾乃設鐸設鞀而蒿萊亦及爰咨爰度而草澤無餘道  
至廣也豈必備乎垂衣之主心之虛也乃旁求於戴笠  
之夫邇言不棄良材必選大度於是乎彰隆業因此而  
顯戒損用以持盈得師期乎主善此聖王樂取之誠心  
而非徒規倣乎先民之舊典



五六天地之中合賦

以敬授民時聖人所先為韻

繫鴻濛之塊垠兮肇兩儀而互應  
昭法象之崇卑兮紛萬物其繁盛  
羌孰體夫天心兮伊誰契乎地柄  
揭造化之元樞兮示羣生以金鏡  
粵若宓義畫卦而知一元之廣運  
亦越周文繫彖而明三才之有正  
於焉定歲序乎星辰總以握網維  
於祗敬爾其渾淪初分經緯斯究  
奇全偶半地天恰配乎朔南兼兩  
函三剛柔各居其左右積五位以  
相乘合六爻而互就置閏則道在  
歸奇積策

則法惟用九載在周禮屬大卜之攸同稽乃虞書實義和之所授孰云一三二四之當前與夫七九八十之應後此蓋陰陽定位其運乃神至聖觀象用以前民來復而知履端於子交泰而識建統於寅覘氣候於十有二月驗歲差於三百六旬彼夫土圭銅渾之是製保章馮相之所陳或北陸而成歲或東嵎以紀春豈能外大衍之名數總萬有之紛綸若乃衍母衍子各殊其用大餘小餘不紊其時雖月窟天根眇忽難窮其象罔而乾維

坤絡翕闢自著其端倪天五得其中也地六從而合之  
五挈陽樞五五二十五數而不忒六維陰紐六六三十  
六宮而咸宜於以協大中之運於以定保合之規乃其  
變化相尋權輿斯定天數六為用而五為體倍其五兮  
天干盈地數五為君而六為臣重其六兮地支竟氣降  
為味兮聿觀大化之所由敷民受以生兮乃識萬彙之  
所從孕圖呈龍馬兮妙用協造化之奇象著龜書兮至  
瑞應憲天之聖辨方辨卦定至定分六甲為日五子維

辰十一而道畢六十而數均極其數兮遂定天下之象  
通其變兮遂成天地之文陽奇陰偶兮合而言之曰易  
天圓地方兮中而處者惟人茲五六之迭乘兮實形生之  
橐籥惟中合之妙構兮顯天地之絪縕於是順布五行  
修和六府言乎理兮健順統會乎苞符言乎器兮權度不  
差夫繫黍用布令於提匱遂紀元於章部占鳥火虛昴而  
定歲功乘震兌坎離以致時序豈其事事而為之則物  
物而為之所哉重曰居寰中以御極兮道在節宣察璣

衡以齊政兮聖人我先愧參贊之靡易兮凜若冰淵顧  
民事之綦重兮時罔或愆敷五典與六職兮取法自然  
期無逸以勤恤兮欽若昊天

--	--	--	--	--	--	--	--

恭祝

聖母皇太后萬壽無疆賦

有序

伏聞累洽重熙光啟壽昌之運垂恩儲祉慶延

慈訓之隆惟懿德在躬以至仁為茂育斯降年有永自

諸福之駢臻我

聖母崇慶慈宣皇太后

化協乾樞

恩周坤絡

興媯佐譽申錫久而長發其祥

明德宣仁垂裕深而並受其福茲值仲冬之月欣逢  
萬壽之期禹甸春回堯封慶洽集衣冠於萬國率拜舞  
於千官共稱北斗之觴竊擬南山之頌謹拜手稽首  
而獻賦曰

惟坤德之無彊乃自天而凝命既體順以承乾適鍾祥  
而衍慶王母受介福遠垂義易之文京室紀徽音載詠  
周詩之盛禮崇尊養會下國之共球律轉陽和運中天



之璣鏡桃熟三千之候愛日舒長山呼萬歲之聲慈雲  
高映占南極之光華奉

東朝之溫清擁佳氣於蓬萊共欽瞻於

慈聖

徽號極域中之尊至仁為天下之

母配天而虔奉三無應地則含弘九有永彌性以優游  
介繁禧而昌後竊欣

膝下之承歡就養無方於左右黃裳中正開長信而禮

洽宮庭

彤幄輝光出甘泉而瑞盈郊  
輶挹天酒以潤芳護迴鳳輦  
而縈宮柳臨華渚以逍遙邁  
斗維之悠久於時律中黃鍾  
日臨嫫女驗添線於金針候  
吹葭於玉呂恭逢誕聖之辰  
正協履長之序聲傳絳幘尚  
衣初進雲表光映朱霞列樹  
猶然彩炬引

璇宮之法駕盛儀衛於鉤陳  
振丹陛之元音應鏗鏘於鍾  
虞雲開扇影瞻

寶座而奏瑤牋香裊爐烟啟芳筵而斟桂醕躬舞蹈以  
奉觴循玉除而容與歡騰薄海慶溢敷天曠代之苞符  
輻輳殊方之寶賁駢闐九葉金芝吐榮華於天秀萬年  
玉冊銘琬琰以神鐫雲綃呈織女之機七襄錦麗寶鬘  
綴仙人之珥四寸珠圓饌龍根而待御擘麟脯以烹鮮  
紫府之瓊漿若醴華封之碧瀉如船盡入充庭之貢並  
登介壽之筵若乃車書南北尉候西東競廁身於朝列  
隨稽拜於臣工共晉九如之祝羣欽萬福之同聽仙韶

之應節規瑞靄之浮空鳳舞鸞歌奏鈞天而陳廣樂雲  
蒸霞蔚揖金母而拜木公花滿瑤池之上籌添海屋之  
中信上元之資福綿景祚於無窮臣祇奉

母儀儼同天覆幸當清晏之期喜值文明之晝遊觀  
上苑効扶侍於

鑾輿瞻望

春暉煥斑斕於舞袖天開有道之祥星紀長庚之宿仰  
純嘏之緝熙兮荷貽謀之孔厚愧頌颺而莫罄兮願福

祿之永茂自今以始兮八千春長祝

慈幃兮無量壽



建福宮賦

居寰中以御物凜

天命兮難諶懼大業之弗勝恒乾惕兮小心戒峻宇與  
雕牆鑒酒池兮肉林愧饑溺其未解遑安逸兮是尋乃  
者新宮落初玉祀金鋪叛名建福義何居乎蓋是地也  
圍於宮牆而弗加擴卑於路寢而弗增華畏矢歆之相  
偏乃託興於清嘉儉不至陋幽而匪遐況在重華之右  
重華宮朕舊居  
也在新宮之左  
比之興慶之宮未費司農之帑何勞庶

民之攻經之營之募千夫而齊力如松如竹閱數月而成功於是殿方馭娑宮比駘盪長春長樂披青簡而空傳太和保和凭朱欄而相望千門萬戶兮想漢制之太奢茅茨土堦兮欽堯儉之堪尚軒號靜怡兮期成性之常存齊名敬勝兮恐舉念之或妄亭顏惠風兮欲膏澤之旁敷閣扁延春兮與羣生而咸暢觸目警心兮守此志而始終居安思危兮常塵懷而籌量爾其文石矗立嘉木叢生羅芝田兮蕙畹來燕賀兮鶯鳴披薰風兮思



解慍對時雨兮樂向榮觀太宇兮調元化育萬物兮驗  
農耕又何必焚隋廷之甲煎樹漢苑之金莖歌陳宮之  
玉樹聽唐曲之新聲而始稱悅情也哉於時而春覽生  
意而欣欣於時而夏遠煩暑而灑灑乃其秋也偉西成  
之可慶乃其冬也體貞元之凝命載色載笑奉

慈闈而承歡來游來歌與良臣而交儆於以承先厘肯  
構而勿忘於以示後庶斯言之是聽重曰洪範有言斂  
時五福敷錫庶民與時茂育予宅是居心乎肅肅受

天之祐匪藉田燭建民之極匪侈華屋繼繩光烈對越  
於穆進賢納諫懲惡旌淑志苟懷安是謂不穀尚慎旃  
哉永膺

天祿

盛京賦

有序

嘗聞以父母之心為心者天下無不友之兄弟以祖宗之心為心者天下無不睦之族人以天地之心為心者天下無不愛之民物斯言也人盡宜勉而所繫於為人君者尤重然三語之中又惟以祖宗之心為心居其要焉蓋以祖宗之心為心則必思開創之維艱知守成之不易兢兢業業畏天愛人於是刑兄弟而御家邦斯以父母之心為心也民同胞而物吾與

斯以天地之心為心也孔子曰明乎郊社之禮禘嘗之義治國其如示諸掌乎宗廟禘嘗之典固先王繼志述事之大經也然自聖人象大過肇封樹以來上陵之制漢代已然我國家肇興盛京邠岐之地橋山在焉昔

皇祖六十一年之間三謁

丹陵用展孝敬

皇考在位百度維新日不暇給適西鄙有事徵役已勞

又

藩邸時曾奉

皇祖命往謁

祖陵是以十有三年中未舉是典予小子繼承丕基懼

德弗嗣深惟

祖宗締構之勤日有孜孜敬奉神貺言念盛京為天作之基

永陵

福陵

昭陵巍然在望不躬親祀事其奚以據憇忱而示來許  
爰以乾隆癸亥秋恭奉

皇太后發軔京師屆我陪都孝思以申

祖武是仰因周覽山川之渾厚民物之樸淳穀土之沃  
肥百昌之繁廡洵乎天府之國興王之會也昔幽居  
相度召頌公劉岐宅作屏周歌太王莫不於

上帝之監觀下民之君宗三致意焉故物以賦顯事以

頌宣既見於斯豈默於言乎遂作賦曰

歲大淵獻時旦柳中協律無射辨方庚辛歷吉日以建  
旗駕應龍之銖鸞紛灘序蕤蛇蜒旌雄虹撞鳴鳶周乎  
神臯之壤屈乎箕尾之躔循我留都殺裡

珠丘懷精氣仰

德流既備既申迺御黼座而覲臣寮維締造之彌艱撫  
草創之鴻圖曰於休哉是蓋突載毫之子殷躡宅鎬之  
姬周憑虛致譏於東約安處薦誚於西踰下此離為十

二之國合為六七之侯。鼎立瓜分者。孟瑣纖旁魄。不足以殫攄。而孟堅平子。太冲者。倫方且豔陳。峭函隴坻之隘。鹽池墨井之腴。朽詣天梁之麗。三條五劇之區。極鋪張以詭辨。彼何辭廼。稱諸奚侔。夫天作之皇宅。又何藉長弘與魏舒。於是諮文獻考圖冊。不慙不文。爰賦其略。聚精構思。挂一漏百。粵我清初。肇長白山扶輿所鍾。不顯不靈。周八十里潭。曰闔門鴨綠。混同愛濤。三江出焉。帝女天妹。朱果是吞。爰生



聖子

帝用錫以姓曰覺羅而徽其稱曰愛新是剪是除匪安  
匪康乃有葉赫輝發界藩撫順遂築城於遼陽以為東  
國之宗

天篤其祐載恢厥功天命十年相險宅中謂瀋陽為王  
氣所聚乃建盛京而俯關西故言其封域則雖始自秦  
漢歷隋唐以迄遼金歟而舉其規模則維新

皇運膺靈佑之獨深也仰符十度之尾實臨析木之津

得雲漢之所垂維北極之所鄰亦何異乎召伯相宅卜  
惟洛食奉春建策留侯演成哉於是乎左挾朝鮮右據  
山海北屏白山南帶遼水滄溟為池澎湃澍澍流湯湯  
赴瀾瀾撇澆洶迴渾漾浴日沃星莫測其始東盡使犬  
之部朔連牧羊之鄙啟我漠惠之原擴我俄朶之址高  
燥埤溼原田每每走大野而拱太室者萬有餘里其山  
則鐵嶺繡嶺平頂降龍木查石門東水南雙矗竭嶰聚  
葱嶺嶺兮劣崩嵌兮嶺峒削兮巖崿嶭兮塘翁蔽虧日

月源流湖江既孕奇而盤鬱亦含秀而隆崇故夫四蹄  
雙羽之族長林豐草之衆無不博產乎其中蹄類則虎  
豹熊羆野馬野驪鹿麋麇狼豺封駝狐狸獾貉跳兔  
婆娑鼯鼯艾虎貂鼠輕嘉其他牛馬羊豕之資以日用  
者蓋填閭巷而烝寢記羽類則野雞沙雞鶩鴨青鸕鸛  
鶴禿鷺維鷗在梁縮脖鳩燕啄木鵲鶻鷹鷂鶻鶻紅牙  
商倉黃鸝鼠化白鴈霜橫曰海東青出黑龍江林擊則  
天鵲鵲魄旬搏則窟兔走僵其他鵲雀銅嘴桃蟲鴛鴦



重唇浮湛劍飾鮫翅抑炙細鱗牛魚之長丈計帶魚之  
白韋編烏鰓之鬚粘石渡父之喙矻船他如蛇馬驢狗  
豚獺豹獮出沒乎洶涌潛躍乎游淵蒼龍捷鬚而雲作  
赤螭掉尾而波開老蚌含珠九光燭天神奇是韞瓊瑰  
是生雖山經與地志羗莫得而詳焉懿茲輿區原隰昀  
昀厥田上中厥壤惟平抱海負蓋跨遼欲宣渾河為帶  
興京為襟袞複陸而坦坦橫拓落而芸芸偉嘉禎之萃  
蒼信橐籥之絃緼

帝眷東顧用畀皇清而為萬載之沛豐若其測圭臬度  
廣輪依繩尺疏渠川歌經始詠攸寧又可略聞矣

天命天聰丕顯丕繼因其舊藩拓我新制規天矩地嚮  
明授時增八門之誅蕩脅九達之邈迤翼翼俾倪岌岌  
堞雉起

園丘於郊南單墀垣之潔祕欽柴颺樞陳玉薦幣鼓雲  
和升繭粟以邀胙饗而昭祀事霜露在履春秋聿遷愷  
乎優乎摩裡閼宮滌濯毛魚元酒太羹

文祖

神宗爰歆於斯符帝車之太乙正王宮於未央重三殿  
之實枚表雙闕於闔閭闕名維何文德武功殿名維何  
崇政建中高樓望氛厥題鳳凰後宮紫極交泰清寧闕  
雝麟趾化洽家邦維樸而安乃鞏而臧豈其工槐檻之  
刻鏤豈其飾棖橈之焜煌豈其疏龍首之裊業豈其叛  
鳳翼之昂藏匪有心於儉約乃潛揆夫陶唐大政當陽  
十亭雁行爰諏爰度日贊日襄吉君臣之一德而擴我

闡於八荒正號紀元以受天慶於是定兩翼之位列八旗之方黃白紅藍有正有鑲法其象於河鼓則其數於義經神其變於三五握其奇於九宮

大聖創制動協天象是猶易之書契乃觀蹄迹焉樹以屏翰馭輕居重本支百世昌我宗潢佐命之勲曰費英東額都希福績茂蕭張曰有坐謀曰有折衝既彬彬而濟濟亦赳赳而彭彭其餘附鳳而攀龍者蓋車載與斗量爰制國書聿興文教演義譯音物取其肖允維大海



克稱檢校雖絕域其必通即織故其亦貌若夫人自為  
戰王者無敵角嚴則百壙失憑旌揮則三邊定檄義不  
返顧勇不重壁是以救四海而莫撓亘千古而鮮匹故  
班錄於累世用以酬夫勞績及其斗杓北指涉冬背秋  
爰狩中原我戎是修靡虹采裊蜺旂拖霧縠建雲旂後  
屬車前導游乘我良產屏彼雕輶右忘歸之箭勁左繁  
弱之弓柔倩淝而雷動鴻網而星流又何必王良執轡  
織阿御輶也哉於是帶甲之士百萬盡發鷹犬而驟驂

騶卑泰山之為櫓跨渤海以張罟林林裔裔列列裒裒  
命地而後中應聲而先拊散墜廩之羣友剔穴狸之伏  
畱駭嶽廩之儻俟驚郊兔之佻偷既肩情指倦而麋麋  
之羣猶緣陵蔽野比夏草之稠焉爰用三驅示無盡劉  
更命羽林欽飛之士手豹尾踞虎頭搏洞熊殲澤獮觀  
壯夫之鶴躍快猛獸之軀腰乃獻我成禽舍彼踐毛擇  
其上殺允惟左膘以奉宗廟乾豆亨炮次充賓客乃薦  
君庖班獲行賞訖乎輿僚是蓋因天地之利習軍旅之

勞戰則克而祭受福古者蒐苗獮狩之禮所為昭詎其  
害三時之土穀奪百姓之腴膏蹂桑柘之地廣虞獵之  
郊如子虛上林之所嘲也哉將將蕃后夔夔列君奉鬯  
來朝齋邀侍宸或稽首而請聘或傾心而納姻於是樂  
以九奏饗以八珍邁呼韓之朝天踰頡利之舞庭合內  
外為一家自我

祖而已然坰牧之宜曰大凌河亘肥壤之博衍茁靈草  
之敷披夏蚊避境春泉漾波是以駟駟之牡蕃孳孔多



杭粟維糜芑梁維赤黃解蠡胡麻來牟鈴鐺蘇分紫赤  
豆有豌豇蔬則藿薹薤蒜蘿蔔韭蔥薑蒿蒲筍紫堇茴  
香壺盧蔓菁蒿苳葵藴鮮不旆旆穉穉唼唼蒙蒙驛驛  
厭厭繇繇穰穰惟脈土之獨純斯穡事之孔良農隙教  
戰守禦相望國以殷富兵以盛彊鬱葱佳氣盤礴無垠  
民風噩噩伋自然休有

烈光格于

皇天

上帝其子之維有歷年是以我

世祖因人心之歸清順天意之厭明掃驅除之閏位統  
子弟之精兵無亡矢遺鏃之費而膺圖正位乎燕京蓋  
嘗考千古之興替稽百代之歷數拒符瑞之難諶信仁  
義之堪守斥逐鹿之蠱說審神器之有授乃知

帝命不時眷清孔厚也不有開之何以培之不有作之  
何以得之夫其披荊棘冒氛霾歷艱辛躬利害無嬖代  
之迹而受車書之來者蓋書所謂于湯有光詩所謂民

之攸歸矣皇矣陪都實惟帝鄉乃命秉鉞之帥乃置五  
部之卿民安郡縣旗樂屯莊春秋耕斂我倉我箱朝會  
朔望躋躋踴踴昭萬年之有道卜百世之靈長乃作頌  
曰

於鑠盛京維瀋之陽大山廣川作觀萬方虎踞龍蟠紫  
縣浩穰爰浚周池爰築長墉法天則地陽耀陰藏貨別  
隧分旗亭五重神基崇峻帝系縣昌周曰邠岐漢惟豐  
沛白水慶善興王之會長白隆隆滄溟濊濊形勝之選

奕世永賴俯臨區夏襟控中外休養百年既豐而泰溯  
其始謀繼序敢懈昔我

聖祖三至斯土焚廬六飛森沉萬旅孔碩九重不遑安  
處祇謁

山陵亦臨朝宇置酒故宮用酬父老乃霈恩施逮乎編  
戶匪勤於巡良慕乎古閔予弗德實纘丕基歲時

太廟陟降格思緬仰

鼎湖惟瞻惟依荷




天之龍際時之和駕言徂東絡繹羽儀風舉雲搖鱗萃  
魚麗我賓我臣我行是隨載至神鄉載覲

園寢靈鬱崇輝祥凝巨瀋原廟衣冠霸陵衾枕松柏雲  
縵溪池流淦盪滌洪爐陶甄羣品石馬悲風淚泉沾衽  
豈必羹牆一氣是稟聿造故宮故宮赫赫聿升太階太  
階奕奕無彩之飾惟厚之積鵠曜翬照歛赭烏赤左城  
右平坤闔乾闢土壁葛燈遐哉儉德詒我孫謀萬年之  
宅乃開南端設席肆筵爰爵周親及彼鴛鸞南陽故舊

洒如言言惟此嘉師

列祖之臣是噢是咻是貽我躬敬之敬之翼翼惴惴於  
億萬歲皇圖永綿



皇清文頴卷首十八